

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 447636 23 St
Tuzla, 09.07.2025. godine

Općinski sud u Tuzli, stečajni sudija Vedran Milašinović, u stečajnom postupku nad imovinom dužnika UG „SIN SOL“ Tuzla, ul. Izeta Sarajlića 2, u stečaju, dana 09.07.2025. godine, donio je sljedeće:

RJEŠENJE

Članovima odbora povjerilaca i predsjedniku odbora povjerilaca se određuje nagrada za rad na ime učešća na sjednicama odbora povjerilaca u bruto iznosima od po 150,00 KM, koja se ima isplatiti na teret stečajne mase.

Obrazloženje

Na skupštini povjerilaca održanoj 16.12.2024. godine je donesena odluka o imenovanju članova odbora povjerilaca i to Mirko Lekić (punomoćnik za Cet Bah doo Sarajevo) kao predstavnik povjerilaca općeg isplatnog reda, Šemsa Dedić uposlenik Porezne uprave F BiH, KPU Tuzla, kao predstavnik razlučnih povjerilaca i Amra Nuhanović uposlenik Uprave za indirektno oporezivanje BH, RC Tuzla kao predstavnik povjerilaca nižeg isplatnog reda.

Članovi odbora povjerilaca su imenovali Mirka Lekić kao predsjednika odbora povjerilaca.

Na sastanku odbora povjerilaca dana 30.05.2025. godine članovi odbora su predložili da sud donese rješenje kojim će odrediti visinu nagrade za članove odbora povjerilaca.

Odredbom člana 88 stav 1 Zakona o stečaju (Objavljeno u "Sl. novine FBiH", br. 53 od 07.07.2021. godine) je propisano da naknade za članove odbora povjerilaca, kao i za članove privremenog odbora povjerilaca sud određuje u skladu sa pravilnikom kojim se propisuju naknade i nagrade za rad stečajnog upravnika iz člana 100 stav 2 zakona.

Shodno odredbama člana 22 Pravilnika o naknadama i nagradama za rad stečajnog upravnika i članova odbora povjerilaca („Službene novine F BiH“, br. 4/22 – u daljem tekstu „Pravilnik“) članovima odbora povjerilaca visinu nagrade određuje stečajni sudija uzimajući u obzir obim posla, složenost postupka i vrijednost stečajne mase (stav 1), visina nagrade iznosi od 50 KM do 200 KM po održanoj sjednici odbora na kojoj je prisustvovao član, odnosno od 80 KM do 250 KM predsjedniku odbora po održanoj sjednici (stav 2).

Shodno odredbi člana 23 Pravilnika, isplata svih novčanih iznosa nagrada u skladu sa pravilnikom su bruto iznosi.

Imajući u vidu sve okolnosti konkretnog postupka bitne za određivanje visine nagrade članovima povjerilaca za učešće na sjednicama odbora, vrijednost i strukturu stečajne mase, donošenje odluka o preduzimanju radnji u pravcu rješavanja spornih imovinsko pravnih odnosa, potrebu donošenja odluka o zaštiti i uvećanju stečajne mase, načinu i uslovima unovčenja stečajne mase, kao i donošenje drugih odluka o važnim pitanjima za postupak koja spadaju u domen odbora povjerilaca sud smatra određenu visinu naknade prikladnom, te je temeljem prethodno citiranih odredaba članova Zakona o stečaju i Pravilnika donio odluku kao u izreci.

Sud napominje da u slučaju eventualnog nastanka novih okolnosti može izmijeniti odluku o visini nagrade za učešće na sjednicama odbora povjerilaca tokom postupka.

Stečajni sudija
Vedran Milašinović

Pouka o pravu na izjavljivanje pravnog lijeka:

Protiv ovog rješenja je dozvoljeno izjaviti žalbu Kantonalnom sudu u Tuzli, koja se podnosi putem Općinskog suda u Tuzli, u roku od osam dana od dostavljanja rješenja.